

## knita' na Rimuy

Rimuy ga, cyux mqwas biru' squ Naro'. Naro' qasa ga, cyux maki' squ syaw na Papak Waqa', zik na rgyax Tana' Noma'. blaq balay ngayan qu Naro' qasa. 'bagan ga, mtasiq kwara' rgyax nya', memaw smyax hyuci' ktan. qmisan ga, mhebung kwara' rgyax, memaw mkbway roziq mita'. llyung nya' uzi ga, qruyux balay ru mtkzi' squ hbun rgyax. Rimuy ga, cyux mqwas biru' squ m'yan qani kinbetunux na qalang.

pqwasan na Rimuy qasa ga, cyux maki' squ ska' balay na rgyax. cingay qqhoniq cyux tlingay kya, ru wahan mtama' mqwas ana nanu' qqbhniq. cingay balay pphpah nya' uzi, ru wahan mzyugi qqbiray ru hhzing. ta qu rrtung ru mtasiq na kk'man nya' ga, mhnuk balay qplan. soyan ni Rimuy musa' hmyapas kya krryax.

maki' qutux ryax, muwah pcbaq qwas na Tayal "Pslkotas" qu Ciwas mha,

" 'ringen na qmisan, kmloh trakis, smi' tamul, musa' qmalup!

kinbahan na Tayal ! mrhu na Tayal !

blaq mlukus ru hata' Pslkotas!

mlikuy ru kneril ! bnkis ru 'laqi'!

hata' mqwas mzyugi' sqqas kinbkisan ta' ru utux kayal."

ini' baqi Rimuy nanu' cyux nya' skal qu qwas qasa ru musa' maqut sinsi la. kmal i Rimuy mha', "sinsi Ciwas! nanu' ma qwas qasa?" smyuk kmal i Ciwas mha,

"qwas qani hiya' ga, nyux pcbaq ita' mha tatuk tunux squ utux kayal.

qwas qani hiya' ga, nyux tegalu' utux kinbkisan ta'.

qwas qani hiya' ga, nyux mha teta' ta' ini' zyungi' kinbkisan ta' ru gaga' ta' ita' Tayal ma."

"han, baqun maku' la." mha Rimuy. ru kmal lozi i Ciwas mha,

" blaq balay ke' ta' Tayal hiya'. ana ungat biru' ta' sraral ga, baqun ta' smi' inlungan kwara'. lokah mqbaq kmal ke' ta'. laxi qelang teta' ini' pskyut qu ke' ta' ita' Tayal." "han, baqun maku' la." mha Rimuy. ru kmal lozi i Ciwas mha,

"qwas qani ga, nyux balay pcbaq 'laqi' kinbahan na Tayal." "misu qani ga, wal ta' zngyan kwara' gaga' ta' ita' Tayal la . ana ta' qwas uzi lga, ini' ta' baqi mqwas." " mha ni laxan ta' gaga' Tayal lga, pngilis ru ps'ang qu utux kinbkisan ta'. mha ni ungat gaga' ta' lga, ungat psrhaw qnxan na ita' Tayal. ptkari' 'laqi' kinbahan na Tayal uzi la."

cingay balay knal ni Ciwas ru si kte' maqut lozi qu Rimuy mha,

"rgyax na qalang maku' ga, mtmaq squ kinraral nya' na--- mtasiq ru mhebung. llyung na qalang maku' ga, mtmaq squ kinraral nya' na--- wal mtkzi' squ hbun rgyax.

ana ga, ini' maku' baqi ---

swa' ini' kal ke' na Tayal kwara' ggluw maku'?

swa' ini' kte' qu trakis ka aki ta' klhun?

wal inu' kwara' Tayal ka pqalup qasa la?

wal inu' kwara' 'laqi' kinbahan na Tayal psqqas Pslkotas la?"

Ciwas ga, suqun nya' mung qu ke' ni Rimuy lga, cyux si tmlux ru ini' kal ana qutux ke' la.